

Cautera mala Buləs aban ká a ban AMƏ FILIPI Məncəu

Cautera mala Buləs aban ká a ban Amə Filipi
ka, Buləs nə giləi ace ikəlisiya mana a Filipi, a bəkú mana yì ka, nda aba kùrban ngga. A bəkú mənə ka abea amətúró kwadi mənana à earnə kanigir male raka à nda aban soaki babumi, sə yì ka, nda aba bumkidikea ace kanigir nyir mənana ndakam aba ikəlisiya a nggea-là Filipi ka. Kat andə amənə ka cau bá cauterəa man ngga, lùmsə nə bumpwasəa andə babum candəa mənana kə pabamuru mə'kərkər nì mala Buləs a ban Yesu Kərəsti nda bərbər nə gandə məngge ka.

Buləs tite nə pak yàwá a ban aməkwadi mala amə Filipi ace boro mənana à túrì wi ban nēi bə pakki wì gbasha aba təle male ka. Kat andə atanni male ka, bak babumia bəà kum məsəkang-kangja abalə atanni malea. Buakia rəia bəà kum ulang bealu mala nongsəmúrú mala Yesu, bəà kəa earì bəbum mala earce bamur rəu andə twəlbəmúrú bə gingnəia dāng. Kasə baləia ama do malea aba kpapi andəa Kərəsti Yesu ka, boro mala bwamuru mala Bakuli na abania ace pabamuru malea; pa ace kpata Nggurcau mala amə Yahudi dāng. Gilə cau amur banboarnado andə dorəpwala mənana Bakuli kə pe abwana mənana à kpapi múrià andəa Kərəsti ka.

Agir mənana abaləi ka

Makkun1:1-11

Abealu mənana Buləs kum bəmúri abaləia
ka1:12-26

Do aba Kərəsti1:27--2:18

Atúró mənana à ndakam ace Timoti andə Apa-
furoditus ka2:19-30

Nunkiru arə abibura andə agir mur'mwana3:1-
-4:9

Buləs andə agyajam male amə Filipi4:10-20

Masələata cau4:21-23

Makkun mala Buləs andə Timoti

¹ Cauterəa mənəia ka, pur nəban Buləs andə
Timoti, aguro mala Kərəsti Yesu.

Aban ká a ban abwana amə fele mala Bakuli
a Filipi, yia mənana à nda aba dotarəu andəa
Kərəsti Yesu ka, kat andə abwana-məgule andə
amə'bwalturo bá ndahiwi.*

² Bə Bakuli Tár səm andə Mətalabangŋo Yesu
Kərəsti, pa wun bəwamuru andə dorəpwala.

Yàwá andə hiwi mala Buləs

³ Bə aya pwari sə ən denyinə wun ngga, ən nggə
pakki Bakuli mem yàwá.

⁴ Hiwi mem ace wun kat ko aya pwari ka, ən
nggə pē nə bumpwasəa,

⁵ acemənana wu pam gbasha aba hamnə Cau
Amsəban mala Kərəsti, twalo a bu-pwari mənana
wu tita oe ka, yi puro adyan.

⁶ Mim ngga, mə ndanə makbaləu ama Bakuli
mənana tita mənəia yì túró məboarne abalə wun
ngga, nə lidəmba nəi aban ká masələe a Pwari
mənana Kərəsti Yesu nə nyar nəi ka.†

* **1:1 1:1** Balli gbal aba: Atúró 16:12. † **1:6 1:6** Balli gbal aba:
1Kor 1:8.

⁷ Bə ən twal wun kat anggo ka, ən b̄warkī d̄ang, acemənana b̄abumam nda arə wun. Wun kat ka wu nda atəm, wu nda arə b̄waləm arə mən̄ia yī tūró Bakuli pam aba b̄wamuru male ka, kat aba k̄urban mem, andə bəl b̄á Cau Amsəban, andə ləmdəi ab̄wana m̄əsəcau mənana abaləi ka.

⁸ Bakuli s̄úrənà rə lime mala earcearəu mənana m̄əndanəi ace wun, andə nzal wun mənana kat ən nggə oe, nə ulang earceban mənana Kərəsti Yesu ndanəi ace wun ngga.

⁹ Sə hiwi mem ngga, nda mənana ama earcearəu ma'wun b̄ə lidəmba nə gulo, sə b̄ə wu l̄ümsə nə s̄úrəə andə b̄waltagir m̄əlime.

¹⁰ Acemənana ən nggə earce ama, b̄ə wu b̄walta ḡir mənana boaro kutiban̄i wun nə twal ka, sə anggo ka wun nə dukdo boarnsari andə d̄wanyicau-arəŷ, ace Pwari nyare mala Kərəsti.

¹¹ Wu l̄ümsə nə abealu mala docauboarna, mənana Yesu Kərəsti pea abalə wun ngga. Mən̄ia ka, nə p̄ə Bakuli gulo andə b̄wangšəban.

*Banboari Buləs ama à haməna
nə cau mala Yesu*

¹² Ado ka ən nggə earce b̄ə wu səl̄əa, wun amə'eamrəarəu, ama agir mənana à kumam kani ka, à nda à tsək Cau Amsəban akiban ngga.

¹³ Àkə c̄ə sə ab̄wana mənana akani, andə amə'yál palta kat ka, à səl̄ə ama m̄ə nda aba nsolo ace Kərəsti.‡

¹⁴ Sə ace k̄uro mənana à k̄uram a ndàkurban ngga, bangula amə'eamrəarəu mənana akani ka, à kum b̄abumcandəa sə à bang cau mala Bakuli nə r̄əcandəa, bangciu p̄à k̄am d̄ang.

‡ 1:13 1:13 Balli gbal aba: Atúró 28:30.

¹⁵ Məsəcau na ama abea bʷana kə hamnə cau mala Kərəsti ace mwararəu andə mbali, sə abea ka, à kə hamnəi nə babum məboarne.

¹⁶ Amənia yia bʷana nənzəmò ka, à kə hama ace earcearəu mənana à ndanəi arəàm ngga. Acemənana à sələna ama Mətalabangŋo twalam ace bəl bá Cau Amsəban.

¹⁷ Abea mənə ka, à kə hamnə cau mala Kərəsti nə məsəcau dāng, à kə hamnəi nə mwararəu, à kə səni kəla à nə tsəa bə rəam kwanam aba kùrban mənana mə ndakam ngga.

¹⁸ Sə mənə ka kidiki kəgìr dāng! Ko bə nda aba məsəcau ko aba nyir ka, à haməna nə Kərəsti, sə aba mənə ka ən nggə pak banboarnado.

E, sə mə nə lidəmba nə pak banboarnado,

¹⁹ acemənana ən sələna ama nə ahiwi ma'wun, andə gbasha mənana Bangŋo mala Yesu Kərəsti pam ngga, agir mənana à kumam ngga, à nə nggá duk panzəban mem.

²⁰ Ən nggə sən dəmba nə tsəkbaləu ama pà mə nə nu kəsəkya dāng ko bəti. A kúnì ka mə nə kum məsəkang-kangŋa pepè, acemənana ado, kəla mənana a koya pwari ka, Kərəsti nə kum gulo a baləam, ko nə yiləmu ko aba lú.

²¹ A banam ngga, do nə yiləmu ka nda ace Kərəsti, sə bə ən wu ka, boaro kutibanì. §

²² Səama bə ən dum nəyiləmu a nggūrəu ka, mə nə pak atúró məboarne kpəm ace Kərəsti. Mím ado ka, məsəcau, ən súrə ko mə ye nda boaro kúti bì ka dāng.

²³ Babumam gau bari: Eare mem ngga, mə nə o

§ 1:21 1:21 Balli gbal aba: Gal 2:20.

mə nə nggá do sənəa Kərəsti, acemənana mənía ka nda nə boaram nə kutibanì ka.

²⁴ Sə ace wun ngga, ndanə boaro bə ən lidəmba nə yiləmu a nggūrəu.

²⁵ Sə acemənana ən earəna nə mənə ka, ən sələnə ama mə nə lidəmba nə do nə yiləmu ace mənana bə ən duk gbashə ma'wun kat, bə wu gulo, sə wu kum banboarnado mala pabamuru.

²⁶ Sə bə ən yina a ban wun dəm ngga, wun nə nggori nə Kərəsti Yesu kərkər ace gir mənana kə pə a baləam ngga.

²⁷ Ado ka, gir mənana boaribanì ka, nda mənana ama wu do kəla abwana mala Kərəsti, nə bwal bəmur rə wun aba njar mala Cau Amsəban. Sə ko bə ən yiu dəm a sən wun, ko ən yiu raka, mə nə ok ce came ma'wun kàngkàng aba Bangjo andə babum mə'mwashati andə bariki a tarə wun ace pabamuru ma'wun arə Cau Amsəban.

²⁸ Wu kəa dum nə bangciu a bədəm abi wun aməbura dāng. Mənə ka, nda nə ləmdəia wia ama à nə nggá kidiki, sə wun ngga wu nə àwá. Mənía ka nda pe mala Bakuli.

²⁹ Acemənana dəmbu mana wu kùmô arə pakki Kərəsti túró ka, pə ace pabamuru nəmurəi a baní dāng, nda gbal acemənana ama wu nə nu tanni ace ka.

³⁰ Mənía yì wara ka səm nda atè sənəa wun. Wu sənəna bariki mem, sə wu ongənəna ce mənə ado mə nda abaləi ka.*

2

* **1:30 1:30** Balli gbal aba: Atúró 16:19-40.

Nyesə bamuru kəla mala Kərəsti

¹ Ado ka, bəkbabum nda kam aba Kərəsti, sə girikiban nda kam aba earcearəu male, sə Bangho mala Bakuli ka, kə yinə dotarəu mwashat a rəarəu. Bakuli pana wun sən məsəswatər mala rəarəu andə ləmdə pe məboarne.

² Ace mani ka, wu ciem bə banboarnado mem lumsəo! Wu earnə rəarə wun. Wu ləmdəiə rə wun earcearəu. Wu do aba kpapi bamuru aba dənyicau ma'wun, kəla wu nda mwashat bərbər.

³ Gir mənana kat wun nə pə ka, wu kəa pe nə earce-bamuru, ko twəlbamúrû dāng; wu nongsə bamur rə wun, wu twal abi wun kəla à kútì wun.

⁴ Wu tsəkir abwana kəla mənana wun nə tsəkir bamur rə wun ngga.*

⁵ Bə babum wun pa kəla mala Kərəsti Yesu:

⁶ Kat andə mani ama nda
mwashat andə Bakuli ka,
twali púp ama nə karə rəi
arə Bakuli dāng.†

⁷ Yəle yì ka, sukki agir kat,
nyesə bamúrì kəla
kəgìr dāng,
sə pa bamúrì kəla guro,
yi pa kəla bwapəndəa
aba nggūrəu.‡

⁸ Sə lang pusəna rəi kəla
bwapəndəa aba nggūrəu ka,
yi nongsə muri
kə oki Bakuli kiru

* **2:4 2:4** Balli gbal aba: Rom 12:10; 15:1-2. † **2:6 2:6** Balli gbal aba: Yoh 1:1. ‡ **2:7 2:7** Balli gbal aba: Mat 11:29; 20:28.

bà lú, nggearə lú mana
amur nggun-gangndəi§ ka!*

⁹ Ace mani ka,
Bakuli gusələi,
tsəi a bancame mənana kúti
aban kat ka.
Sə pe wi lulləu mana
kàrmúr alulləu kat,†

¹⁰ ace mənana nə lullə
Yesu ka, koya nkūnu,
mala agir mana a kùli,
andəa mana a nzali,
andəa mana a tà-nzali ka,
à nə kùndəǎ.‡

¹¹ Sə koya lasəu ka,
nə bang bwāng ama,
<<Yesu Kərəsti ka
Mətalabangŋo na,>>
ace gusələ Bakuli Tárrú.

Ləmdə təlaban ace Kərəsti

¹² Wun agyajam mem mənana ən earkiyi acea
raka, mənana mə ndá aban wun ngga, wu kə ok
kuru pwari-pwari. Sə ado mənana ən pā aban wun
raka, boaro bə okiru ma'wun bə kúti mənə. Wu
pak túró mala amsəban ma'wun nə bangciu andə
rəbəla.

¹³ Bakuli ka, nda rə pak túró abalə wun, bə pā
wun rəcandəa andə babum mala pak gír mənana
nə pwasəbumi ka.§

§ **2:8 2:8** *lú mana amur nggun-gangndəi*: ko <<ulang lú mənana lú
súban na ka.>> * **2:8 2:8** Balli gbal aba: 2Kor 8:9; Ib 5:8. † **2:9**
2:9 Balli gbal aba: Rom 10:9; 14:9; Afi 1:20-21. ‡ **2:10 2:10** Balli
gbal aba: Isha 45:23; 49:18. § **2:13 2:13** Balli gbal aba: 1Kor
15:10.

¹⁴ Wu pusə nggwani andə makgìr abalə agir mənana kat wu pakkiyi ka.

¹⁵ Anggo ka, wun nə duk amuna mala Bakuli, amə đwanyicau-arəŭ, amə babum boarnsari, andəa mənana à pà nə kum kə məbane a rəia raka. Wun nə dukdo anggo abalə abwana mala nza mə đwanyi məsəcau andə mə kpata njar kidiki, mənana wun nə nggə tǎ abaləi kəla anlero aba banza ka.*

¹⁶ Sə aba doe anggo bə wu kə bwal kàngkàng arə cau mənana pākiyi yiləmu ka. Bə wu kə pa anggo ka, a pwari mənana Kərəsti nə nyar nəi ka, mə nə nggori nə wun, sə mə nə sələ gbal ama túró mem andə bariki mem ngga, à pà bə đang.

¹⁷ Pabamuru andə atúró ma'wun aba kpata Mətalabangŋo ka, à ndà kəla pa boro a baní. Sə ko bə yi do ama à nda rə đārə yiləmem kəla gìr-đārəa amur mənəia yì boro mala pabamuru ma'wun ngga, bumam nə pwasəo, səm nə pak banboarnado a tarə səm kət.

¹⁸ Wun gbal ka, ban nə boara wun, wun nə pakkidire atəm.

*Buləs b̄wangsə Timoti
andə Apafuroditus*

¹⁹ Bə Mətalabangŋo Yesu ear ka, mə ndanə tsəkbələu ama mə nə tasəta Timoti aban wun, adyan tǔ, ace mənana bən yi kum bəkbabum arə cau mənana mə nə yia oè amur wun ngga.

²⁰ Ən panə kəbwa kəla yì, Timoti, mənana kə tsəkir wun pepe aba məsəcau ka đang.

* **2:15 2:15** Balli gbal aba: Nggur 32:5; Mat 5:45,48.

²¹ Koyan ngga, gır mənana babumi earikiyi ce ka nda pakkiyi ka, à tsəkir túró mala Yesu Kərəsti dāng.

²² Sə Timoti ka, wu sələna ama ləmdəna bamúri ama kārəna bwa. Pàngŋənà túró atəm kəla muna andə tárri. Yì ka, bwalàm nggàm aba túró hamnə Cau Amsəban.

²³ Ace mani ka, mə nda rə tsəkbaləam ama bən súrənà rəgır mənana mə nda abaləi ka, mə nə túrí a ban wun.

²⁴ Mə ndanə tsəkbaləu arə Mətalabangŋo ama mim nə nggearəam ngga mə nə ká a ban wun, banì pà nè sau dāng.

²⁵ Ən səni, ndanə boaro bən nyesəa wun Apafuroditus, mə'eambam, biam mətúró andə biam soje. Yì dəm ngga nda bwa mənana wu túrí bə tsəkiram aba dotəle mem ngga.

²⁶ Ado ka, rəi kə bəla ace sən wun. Banboari wi dāng, mənana sələ ama wu ongŋəna ce rəkwana male ka.

²⁷ Aba məsəcau ka, rəi kwani kərkər, yàle ue bəti bə wuna. Sə Bakuli ka, sən məsəswatər male andə mem gbal, sə amsəi, ace mənana bumkidikea mem bə kəa gul kərkər dāng.

²⁸ Bumam kə pi bən tasəa wun tē dəm, acemənana ən sələna ama bə wun səni dəm ngga, babum wun nə pakkidire, sə mim gbal ka babumam nə nongŋo.

²⁹ Wu gingsəi nə earcearəu mala aməkwadī, nə banboarnado pepè, andə pagulo, kəla mənana boaro bəa pea amə pakki Mətalabangŋo túró ka.

³⁰ Acemənana apī lú bəti aban pakki Kərəsti túró.

Twal yiləmi a kun kəgìr dāng aba pakkam túró mənana bə wun nda wun nə pakkam ngga.

3

Kəa gūli arə nggūrau dāng

¹ A masələate ka, wun amə'eambəam, bə ban boara wun ama, wu nda ka mala Mətalabangho. Bəsələ gilə agir mənana ən giləa wunia a dəmba ka, kwan rəam dāng. Nda ace yál pabamuru mə'wun.

² Wu tsəkir wun arə anvwa mənə, amə'bealbikea, mənana à cam kingging nə cau mala kasə-batau ace kum amsəban ngga.

³ Səm mənana səm nggə peri aban Bakuli aba Bangho ka, səm nda ka abwana mənana à kasəa səm batau aba məsəcau ka. Səm ngga, səm nggə nggori nə Kərəsti Yesu, səm gūli arə agir mənana à pə aba nggūrau ka dāng,*

⁴ kat andə amani ama mə nə gandə jali nə aməno yì agir ka.

Bə abwana nakam mənana à kə səni kəla à ndanə agir mənana à nə jali nəia ka, mə ndanəia pas mənana à kúti malea ka.

⁵ Acemənana à kasəam batam a tongno-nong-tàruia nongho anzəm bəlám,† mə nda bwa Isərayila, a tau mala Benjami, bwa Yahudi məbafoe. Sə bə nda ace kpata Nggurcau mala Musa ka, mə nda bwa Farisi, mənana à ndanə bumpina arə kpata Nggurcau ka.‡

* **3:3 3:3** Balli gbal aba: Rom 2:28-29; Gal 6:14-15. † **3:5 3:5** Balli gbal aba: Tite 17:12; Pəris 12:3. ‡ **3:5 3:5** Balli gbal aba: Rom 11:1; Atúró 23:6; 26:4,5.

⁶ Bə nda a cau mala pakki Bakuli túró nə bumpina ka, bafo ən pe ikəlisiya tanni kərkər. Sə bə kər a bui mala docauboarna aba kpata Nggurcau ka, ko ən yallì kə bə dāng.Ş

⁷ Agir mənana didyal ən nggə twalia kəla agirkuma ka, adyan ngga, ən nyesəia bə, ace cau mala Kərəsti.

⁸ Sə kəgír pà kàm à nə kàni arə sùrə Kərəsti Yesu Mətalem dāng. Ən nying girbunda kat ace cau male. Ən sukkinia, ən twalia à pà a kun kəgír dāng, ace mənana bə ən kum Kərəsti,

⁹ sə bə səm duk mwashat səni. Ən nggə twal cauboarna mala bamúràm mənana à kumgiyi ace kpata Nggurcau ka kəgír na dəm dāng; she kə mənana à kumnggiki nə pabamuru aban Kərəsti ka. Acemənana njar mana Bakuli nə tsək səm, səm nə duk abwana məboarne a kəne male ka, ndă bə səm pa bamur səm aban Kərəsti ka.

¹⁰ Ən nggə earce sùrə Kərəsti andə rəcandəa mənana loasəi a bəmbe ka. Ən earəna mə kum kāmbe mem aba nu tanni atè, mə nə wú a cau male,

¹¹ nə tsəkbaləu ama, ko lang ngga mə nə kum lo a bəmbe.

Bariki aban ká lùmsə túró

¹² Mim ngga ən twali ama ən bwaləna ban came dāng, sə ən malaká lùmsə gbal dāng. Mə nda aban bariki mə nə kum gír mənana Kərəsti Yesu ciem, ən duk male ace ka.

¹³ Wun amə'eambəam, ən twali kəla ən kuməni dāng. Gír mənana mwashat ən nggə pak ka, nda

Ş 3:6 3:6 Balli gbal aba: Atúró 8:3; 22:4; 26:9-11.

mə lóré gír mənana kutina ka, sə mə soa məsəu atə gír mənana nda a dəmbam ngga.

¹⁴ Ən pa rəcandəa arə bəngmire aban ká masələate, ace mənana mə kum tangnakusəu a kùli, mənana Bakuli tunəam ace nə pam aba Kərəsti Yesu ka.

¹⁵ Səm mənana kat səm gulna aba Kərəsti ka, bə səm səni anggo. Sə bə abea bəwana atə wun, à ndanə bəkə dənyicau dāng ngga, Bakuli nə məngia wun bələi.

¹⁶ Səm ngga, bə səm bwal kəngkəng arə bəncame mənana səm bingəna kam ngga.

¹⁷ Wun amə'eambəam, wu twal kusəam, sə wu kənə arə abwana mənana à kə twal kusəu mənana səm ləmdəa wun ngga.*

¹⁸ Kəla mənana ən nunkir wun tütü dīdyal ka, sə adyan ngga, mə nda bən bəsələa wunə dəm nə mərəm a məsəam, ama abwana pas ka, abia aməbura mala nggun-gangndəi mala Kərəsti† na.

¹⁹ Masələatea ka, kīdiki na. Bakuli malea nda bumia, agir kəsəkya à nda ka agir jali malea, sə babumia ka nda amur agir bəanza.

²⁰ Sə mə'səm ngga, səm nda ka abwana mala kùli. Səm nda bən kundə nyare yiu mala Mə'amsə səm nə kuli, yī Mətalabangəo Yesu Kərəsti.

²¹ Nə rəcandəa male mala gandə nyesə agir kat abata yálban male ka, nə yia nggadī nggürə səm mə ká lui bə pā kəla nggürəi məboarbəwe.‡

* **3:17 3:17** Balli gbal aba: 1Kor 4:16; 11:1. † **3:18 3:18** abia aməbura mala nggun-gangndəi mala Kərəsti: Ko <<Abwana mənana à bīnəce kanigir amur lú mala Yesu amur nggun-gangndəi ka.>>

‡ **3:21 3:21** Balli gbal aba: 1Kor 15:35-58; Kol 3:4.

4

¹ Ace mani ka, wun amə'eambəam, wu cam kàngkàng aba kpata Mətalabangŋo. Wun mənana ən earkeyi earce wun raka, sə babumam kə pi ace sən wun ngga, wu nda ka banboarnado mem andə mbulan-gulo mem.

*Buləs bakbabum amə kpata
Mətalabangŋo*

² Ən nggə buaki arə Yudiya sə ən nggə buaki arə Səntəki, wu earnə rəarə wun, acemənana wun ngga, wu nda ka mala Mətalabangŋo.

³ E, ən nggə zəmbo gbal, we biam mətúró məbafoe. Bwalì amaməna mənía ka. Yia ka à pak túró kərkər atəm aban hamnə Cau Amsəban, atarə səm sənəa Kəlemen andə acili abiam amətúró, mənana alulləia ka, à nda aba Maləmce mala Yiləmu ka.

⁴ Wu dum nə banboarnado aba dotarəu ma'wun wunəa Mətalabangŋo, a koya pwari ka. Nyare mə nə na wun dəm: Wu pak banboarnado!

⁵ Bə bwapəndəa sən domunyi ma'wun aba gir-bunda kat. Pà nə sau dang, Mətalabangŋo nə yiu.

⁶ Kəgír bə kəa tsək wun a do-tiki nə múrú dang. Aba koya gír ka, wu pakhiwi nə zəmba, wu ləmdəi 'Bakuli agir mənana wu earkeyicea ka, sə wu kə pak yəwá.*

⁷ Sə dorəpwala mala 'Bakuli, mənana kəbwa pà nə bwalte raka, nə bwal babum wun andə dənycəu ma'wun aba Kərəsti Yesu.

⁸ A masələate ka, wun amə'eamrəarəu, bə dənycəu ma'wun bə do amur gír mənana kat

* 4:6 4:6 Balli gbal aba: Mat 6:25-34.

məsəcau na, nə yinə gulo, à nə pè aba kpate a njari, məboarnsari na, məboarne na, andə mənana à nə earce ka. Gır mənana kat karbaŋ nə boaro, sə gır mənana kat karmúr boaro ko nə yinə bʷangsəban ngga, wu tsək denyicau ma'wun amúrià.

⁹ Agır mənana kat wu kanì, wu oè, wu é, sə wu sən arəəm ngga, wu cia aba túró. Sə Bakuli mənana kə pa dorəpwala ka, nə do atà wun.[†]

*Buləs ləmdə yàwá ace
aboro mana à pe wi ka*

¹⁰ Ban kə boaram kərkér nə Mətalabangŋo, ama wu ləmdəna denyinəban ma'wun acem dəm. Ən sələna ama wu kə denyinə mim koya pwari, sə banì sauwuna bəti mənana wu kum dəmbu mala bwaləm nggəm raka.

¹¹ Ən pa aban bang mənəia yì cau ka, acemənana mə nda aba təle ka dāng. Mīm ngga ən kánina do dəmba nə gır mənana kat mə ndanəi ka,

¹² Ən súrənà rə do aba təle andə kume. Ən kánina do aba koya gır; ko aba dəmbəo, ko aba nzala, ko aba kume kpəm, ko aba dʷanye.

¹³ Mə nə gandə pak koya gır ka, nə rəcandəa mənana Kərəsti kə pam ngga.

¹⁴ Kat andə aməno ka, gbasha mənana wu pakkam abalə atanni mem ngga, ndanə boaro.

¹⁵ Wun amə Filipi ka, wu sələna ama abalə anonggio mala tita túró hamnə Cau Amsəban mem, lang ən nying Masədoniya ka, kə wun nda

[†] 4:9 4:9 Balli gbal aba: Rom 15:33.

kə ikəlisiya mənana bwaləm nggàm, aba paboro ka. Kə bə ikəlisiya pa kàm anggo dāng.‡

16 Ko mənana mə nda a Tasalonika ka, wu tūrāmban nə aboro, ace pakkam gbasha, pà kusə mwashat dāng.§

17 Ən pa aban bang mənia yì cau ka acemənana mə nda rə alta boro aban wun ngga dāng. Nda ace mənana bə wu kum tangnakusəu mala pəməboarne ma'wun ngga.

18 Ado ka, ən kuməna agir mənana kat bən pangnəia ka, yələ nə mur amurí. Ən lumsəna nə agirbunda kərkər nə aboro mənana wu tasəamban nəia nə bu Apafuroditus ka. À nda kəla aboro məboarne mənana agir'a na a ban Bakuli sə à kə pwasəbumi ka.*

19 Bakuli mem nə pà wun koya gır mənana wu kə paktəle ka, aba kume male nggea mə'nyangsangni† nə bu Kərəsti Yesu.

20 Adyan ngga, bə gulo o a ban Bakuli, yì Tár səm, málá male pà kàm dāng. Bə do anggo.

Məsələata makkun

21 Wu pà makkun mem a ban aməkpata Kərəsti Yesu. Amə'eamrəarəu mənana səm nda atarə səm ngga, à kə makka wun kún.

22 Abwana mala Bakuli kat kə makka wun kún, nggeamurəmi ka amənana aba bala mala Kaisar‡ ka.

‡ 4:15 4:15 Balli gbal aba: 2Kor 11:9. § 4:16 4:16 Balli gbal aba: Atúró 17:1; 1Tas 2:9. * 4:18 4:18 Balli gbal aba: Pur 29:18.

† 4:19 4:19 mə'nyangsangni: ko <<məboarne,>> ko <<məgule,>>

‡ 4:22 4:22 Kaisar: Mənia ka nda murəm məgule mala amə Roma.

²³ Bə bʷamuru mala Mətalabangɔ Yesu Kərəsti
do atə wun kat.

Mbula-Bwazza
Portions of the Holy Bible in the Mbula-Bwazza
language of Nigeria

copyright © 2022 The Seed Company

Language: Mbula (Mbula-Bwazza)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-12

PDF generated using Haiola and XeLaTeX on 10 Sep 2025 from source files dated 12 Jul 2025

dc693218-7e0b-5547-ab57-2e0275b90e93